

17 JUN 2003

SHAFIE-KREDIT

BPMB LULUS 1,226 PINJAMAN KREDIT MIKRO BERJUMLAH RM17.8 JUTA

KUALA LUMPUR, 17 Jun (Bernama) -- Bank Pertanian Malaysia Berhad (BPMB), salah satu daripada dua bank yang diberi tanggungjawab menyalurkan pinjaman skim kredit mikro, sehingga semalam, meluluskan 1,226 pinjaman berjumlah RM17.8 juta untuk membantu peniaga kecil.

Timbalan Menteri Kewangan Datuk Dr Shafie Mohd Salleh berkata, jumlah itu adalah antara 4,081 permohonan bernilai RM63.2 juta yang diterima BPMB untuk mendapatkan pinjaman itu.

Sementara Bank Simpanan Nasional (BSN) pula menerima 1,076 permohonan bernilai RM18.5 juta, katanya pada sidang media di ruang legar Parlimen di sini hari ini.

Skim kredit mikro merupakan pinjaman mudah sehingga RM20,000 tanpa penjamin diumumkan Perdana Menteri Datuk Seri Dr Mahathir Mohamad yang juga Menteri Kewangan dalam pakej Strategi Baru bernilai RM7.3 bilion pada bulan lalu dan dilancarkan pada 4 Jun lepas.

Sebanyak RM500 juta dari peruntukan di bawah pakej itu disalurkan kepada BPMB, dan RM300 juta lagi kepada BSN untuk diagihkan kepada peniaga kecil sebagai pinjaman mudah.

Shafie berkata, BPMB mengambil masa yang cepat meluluskan pinjaman kerana hanya mengambil masa lima hari bekerja disebabkan kelulusan pinjamannya dibuat di peringkat cawangan.

Selain borang permohonan BPMB mudah diisi, pemohon hanya perlu mengisi setengah muka surat dengan butiran yang diperlukan serta tidak mempunyai sebarang masalah kewangan atau kes keberhutangan, katanya.

Sementara BSN, kelulusan permohonan dibuat di ibupejabat dan mengambil masa sehingga 15 hari untuk diluluskan, katanya.

Beliau berkata, selain itu BSN memperkenalkan sistem "mentor" di mana permohonan hanya dibuat melalui "mentor" yang dikenalpasti oleh persatuan peniaga, untuk menjalankan tugas tersebut.

"Seorang mentor dipertanggungjawab membantu 10 peniaga kecil untuk membuat permohonan dan mentor itu akan mendapat sugu hati RM400 bagi setiap permohonan yang berjaya mendapat kelulusan," katanya.

Beliau berkata mentor yang telah dikenalpasti itu kini sedang menjalani latihan di BSN mengenai tanggungjawab mereka yang baru itu.

Shafie berkata, kedua-dua bank itu akan hanya memberi pinjaman kepada peniaga yang tidak mempunyai hutang lapuk terutama dengan "along" bagi memastikan pinjaman itu digunakan untuk merangsang ekonomi dalam negara seperti matlamat asalnya. -- BERNAMA

HK HK AHM